

【老屋下个風景】蕭瑞琪原作

半晝邊，轉去老屋下遶遶啊。一行入屋裡背，阿爸坐在矮凳仔、報紙放在矮桌仔頂，棚等目鏡在該看國家大事；阿姆坐在竹椅、腳架在細矮圓凳，目聚聚仔看等家庭副刊。日花仔對窗仔斜斜戥入屋肚恬靜恬靜，眠在桌頂頂个烏貓仔兩隻腳還擡等報紙在該睡目，分吾个打門聲嚇一下，擘開目珠懶懶个看過來，又眠轉去繼續睡厥目。

老屋下有三隻貓仔，全都係路脣拈來个。該當時還係細貓子，正開目¹無幾日，分人用紙箱仔裝等囤在路脣草墩頂。阿爸散步經過，聽著細細聲个喵！喵！喵，正發現這兜衰過个細貓子。阿爸同細貓子帶轉屋下，倒一息仔牛乳在盤仔，細貓子鼻著牛乳味，搖搖擺擺行到盤仔脣，用厥幼幼仔个舌嫵緊舐，牛乳還膏到厥鬚鬚頂變白鬚仔，當得人惜。三隻貓子个毛色無共樣，一隻像乳牛一跡烏一跡白，尤其四隻腳个腳趾頭前白白，當像著白襪樣仔，就同佢安名「細白襪」；另外一隻全身係烏金烏金个長毛，就喊佢「長毛仔」；還有一隻生著柑仔色，又有一浪一浪个花

紋，就安到「細柑仔」。毋過阿姆無恁大神氣記佢兜个名仔，就喊佢兜「花花个」、「長毛个」、「黃黃个」。

細貓仔日見日大，變到活跳个大貓仔，不時會自家打開窗門走出去野上野下，等到野塚地又對窗門鑽入來。貓仔本成就係貓科動物，同獅仔共樣有打獵个本等，雖然經過地一萬年个馴化，毋過厥本能還無完全消失。故所，佢兜暗晡頭時常會走出去捉老鼠仔、透地龍、壁蛇轉來放在門頭前；日時頭還會在陽臺晡鳥仔，見擺係看著佢恬索索仔跔在該，目金金仔看等屋頂，總會有飛毋掣過个禾鷄仔、斑鳩仔、月鴿仔畀打下來。

這駁仔轉去老屋下，總會看著三隻貓仔目絲絲仔在該啄目睡，阿姆講：「這兜貓仔老地唷，毋多好出去寮地，每日眠在屋肚睡目。」係照貓仔个年紀來算，佢兜也係高齡貓地，逐朝晨兩個看報紙个老人家同三隻啄目睡个老貓仔就係老屋下个風景。

¹ 開目：音 koi / mug ；動物初次張開眼睛。